

Religiosum ejusdem Ordinis et, ubi hic desit, Sacerdotem sive sæcularem, sive regularem, qui personarum ad novam Sodalitatem pertinere cupientium catalogum conficiat, atque custodiat. Idem possunt Provinciales nisi auctoritas Ministri Generalis obstet, intra limites propriæ Provinciæ, et etiam Superiores locales, dependentes tamen a Ministro Provinciali.

VI. Ad Directorem spectat nominare zelatores et zelatrices qui vel quæ personas inscribendas prudenter quærant, eidemque Directori proponant.

VII. Ad exercitium Viæ Crucis viventis rite peragendum, et ad Indulgentias eidem adnexas lucrandas, requiritur meditatio Stationis unicuique per sortem assignatæ, et recitatio trium Pater, Ave et Gloria, manu tenendo Crucifixum ex materia solida confectum, et ad hoc benedictum sive a Ministro Generali, sive a Ministro Provinciali in respectiva Provincia, vel a Superiori locali, aut etiam ab ipso Directore, vel alio Sacerdote a Ministro Generali delegato.

*Index Indulgentiarum Sodalitatibus Viæ Crucis Viventis
tributarum.*

Omnes christifideles ab aliquo Directore in Sodalitatem admissi, sequentes Indulgentias lucrari possunt :

I. Primo die festo postquam sodalitatem adiverint plenariam indulgentiam, si eodem die, vere poenitentes, confessi, S. Synaxim susceperint.